

Discurs cun Sandro e Livio Simonet

«En de da skis ad onn è la fegnameira»

Sandra Balzer/FMR

Els èn skiunzs professiunals e frars – Sandro e Livio Simonet da Casti. La staschung vegnenta è pi speziala tgi schiglio: Sandro Simonet parta per l'amprema geda scu atlet dalla squadra naziunala e Livio Simonet dat igl sies debut ainten la coppa mundiala. Per la FMR vaia discurreia cugls dus frars davart tratgs communabels, taimp liber e la rolla da lour genitours.

Igl è sto en de decisiv ainten la carriera digl skiunz da Casti, Sandro Simonet (26): aint igl slalom dalla coppa mundiala igl schaner passo a Chamonix ò el fatg igl zap da posiziun 30 segl podest ed è davanto terz. Swiss-Ski pretenda en plaz da podest per appartigneir alla squadra naziunala, uscheia ò el do liber igl sies plaz aint igl cader B. Egn da chels plazs occupescha da curt sies frar Livio Simonet (23).

Angal skis cun cantas

Igl è en de da november cura tg'ia ma scontr cugls dus Simonets aint igl local da fitness ainten l'arena da biatlon a Lantsch. Oravant treneschan varsaquants passlungnists. Igl dus frars èn peregrna, tgi la loipa seia navot per els. «Igl è mengia strantg e tigneir la balantscha sainza cantas è difficil», manegia



Igl dus frars Livio (san.) e Sandro Simonet treneschan gugent er ansemen aint igl local da fitness a Lantsch.

Sandro Simonet. Chegl tgi pertotga las disciplinas alpinas sa distinguan igls dus frars: Sandro Simonet sa focusescha cunzont segl slalom, e la disciplina prefereida da Livio Simonet è igl slalom gigant. Èn las cursas rapidas forsa mengia spertas pigls Simonets? «Per me ègl definitivmaintg mengia privlous, ni mengia lungurous», manegia Livio Simonet. Oter vei chegl sies frar: «Avant tgi far cursas rapidas lessa primarmaintg ma migliurar e tigneir la constanza aint igl slalom. A lunga vista lessa pero er absolver cursas rapidas.»

Tigneir e stabilisar la posiziun

Las davosas emdas ò Sandro Simonet passanto an Svezia per trenar segls skis e testar igl material. Igl trenamaints da fitness èn las davosas preparaziuns per l'amprema cursa da slalom igls 12 da december an Val d'Isère. «Ia sung pront», dei el optimistic. Dantant tgi Sandro Simonet spetga oramai anc sen l'amprema cursa per chella staschung ò sies frar do da curt igl sies debut ainten la coppa mundiala cun esser partia aint igl slalom parallel a Lech/Zürs. Igl sies debut peglia el cun umor e manegia: «Igl è ansasez sto per navot, sung crudo or a va fatg nigns puncts. E tuttegna ègl stada ena bel'experientscha.» Daple success ò el gia igls 23 da november a Zinal cun gudagner igl amprem slalom gigant da chesta staschung sen

livel da FIS. Fegnameiras persequitescha Livio Simonet dantant betg: «Ia va pigl moment ena bunga furma, forsa tanschigl schizont per egn u dus zaps anavant. Ia vard, tge tgi la staschung porta.»

Sandro Simonet

De da naschienscha: 05-07-1995
Carschia se: Casti
Li da dimora: Savognin
Disciplina: slalom
Uniun: squadra naziunala
Skis: Rossignol
Hobis: tgatscha, pastger, liger

Livio Simonet

De da naschienscha: 24-08-1998
Carschia se e li da dimora: Casti
Disciplina: slalom gigant
Uniun: cader B
Skis: Rossignol
Hobis: fotografar

«Avant tgi far cursas rapidas lessa primarmaintg ma migliurar e tigneir la constanza aint igl slalom.»

Sandro Simonet



Sandro Simonet (san.) durant las davosas preparaziuns avant l'emprema cursa da skis. Sies frar Livio Simonet ò gio absolvo enqualtgi cursa chesta staschung.

«El è treis onns pi vigl e simplamaintg gio en po pi carschia.»

Livio Simonet

En team da slalom fitg ferm

Tigneir la furma e stabilisar la sia posiziun vala er per Sandro Simonet, simplamaintg dus zaps davant sies frar. Igl favrer on li igls gis olimpics a Peking, sa participar pon pero an gal igls quatter miglers da mintga disciplina. La concorrenza è gronda: actualmaintg sa cattan seis atlets svizzers aint igls top 30 dalla disciplina slalom. «Scu atlet è l'olimpiada adegna la fegnameira. L'equipa da slalom svizra è dantant fitg ferma, uscheia tgi na saro betg schi simpel. An general lessa esser pi constant tg'igls davos onns», dei Sandro Simonet.

Madem e tuttegn different

Digls quatter fardagliuns seian els dus sumigliants, deian igls dus Simonets. «El è treis onns pi vigl e simplamaintg gio en po pi carschia», dei Livio Simonet cun en surreir dantant tgi nous tschantagn segls urdegns da fitness. Cun esser igl frar pi gioven è el adegna en pêr zaps davos sies frar, aglmanc sen nivel sportiv. «Ia sung perfranc ainten la sia sumbreiva, vei chegl pero positiv: uscheia vaia igl mies pôss e sa ma sviluppar anavant.» E tge dei sies frar grond? Sandro Simonet: «El fò slalom gigant ed ia slalom. Vasia uscheia è el ansomma betg davos me, mabagn gio en zap davant me», dei Sandro Simonet.

Ena famiglia sportiva

Igls Simonets èn ena famiglia sportiva: la mamma anterioura skiunza, igl bab en grond fan da skis ed igls ulteriours dus frars skiunzs durant lour unfanza. «Igl noss taimp liber vainsa passsanto ve là», dei Sandro Simonet e mossa an direziun digl territori da skis da Lai. Quatter unfants, seis onns egn ord l'oter e differents programs da skis: ena veira sfeida pigls genitours. «Chegl è sto en stress per la mamma. Sainza igls noss genitours fissans

tots dus betg tar chel punct dalla carriera», dei Sandro Simonet.

Eir cun skis è la professiun

Aint igl taimp liber èn igls frars darar segls skis. «En de da skis ad onn è la fegnameira», manegia Sandro Simonet. Eir cun skis n'è betg en hobi, mabagn lour professiun. «Ia leva adegna davantar profi. Tge tgi vign siva la carriera è avert. Ia pains, tg'ins so adegna

scumanzar ensatge nov», dei Sandro Simonet. Ensatge nov scumainza pigls dus frars an mintga cass er chesta staschung: cur-sas ainten la coppa mundiala scu part dalla squadra naziunala resp. digl cader B ed ena staschung olimpica.

Ia sort dall'arena da biatlon a Lantsch e sung marvegliosa, quantas gedas tg'igl nom «Simonet» cumpara chesta staschung an gleisch verda segl monitour.



Els èn frars e skiunzs professionals: Livio (san.) e Sandro Simonet.

Fotos Sandra Balzer